

2012



Rotstab-Chlütterer

96



**Säg du liebe Rating-Gott –
bini no rych oder scho bankrott?**

Los Börsefreak, halt jetz di Schnörre,
leg e neuu Batterie ins Ohr,
Hüt hei mir e dummi Röhre
Anderi hei se s'ganzi Johr.

Do gits e Bude - Global Player
Ä, wie heisst die jetz scho wider?
Die stoht allbott eus uf den Eier,
Zwar git nach usse si sich bider.

Jetz chunnts mer, s'het ztue mit me Ständer,
e Buur chunnt au im Name vor,
ab dene länsch di übers Gländer
Ständert Puur macht s'chotze vor.

Ellerli bellerli ribedi ra
I läng in d'Wundergugge
So chündt der Rating Gott sich a,
scho hesch, vertelli, s'Zwöi am Ruggle!

Grad wie der Römer Cäsar Schüll
Syni Düme gsänkt und gstretcht het,
dä Gnom mit Lumpepack Kalkül
Eusi Wirtschaft bös verdräckt het.

Derzue ghörsch en no hämisch lache
Sy Stinkifinger zeigt nach unde,
Im Grund gno isch dä nit ganz bache
E Stellignahm nit nötig gfunde.

D' Spanier, Portugiese Grieche
Der gallisch Guggel samt syne Hiener,
das syge schints ganz armi Sieche
Wll s'Schmiergäld nümm so fliesst wie früener.

Bald au bi eus stöhnt Hans wie Otto
Und bätte Rating, rating, rating,
Hän d'Hose voll, so nach em Motto
Uf dys Urteil we are waiting.

S' Dolce Vita Life uf Pump
Zwar wältwyt isch zem Hobby worde,
Wie em Känguru sy Gump
Mit leerer Täsch tuet überborde.

Und scho isch der Zapfe ab!
D' Aasgeier vo der Standert Pur
Löhn s'Trippel A dur d'Schissgass ab
Dass D'Merkel abbricht d'Lifting Kuur.

Der Schwob ellai loht sich nit deckle
Dank öis bhalte die s' Trippel Ai,
für VW, Filet, Pampers seckle
„ghaufsch olles drive bim Hyber oi.“

Aene däne disse gschisse
Wer wei als neggst zur Sau mir mache?
Au d'Bulwar Press find sich gerisse
Mit Städte Rating Chöle z'mache.

Wie vill Beize hets pro Nase?
In welem Freibad blutti Buse?
Hunds cheigel pro Quadrat im Rase
Wo chunsch bir Parkbuess du no use?

Wo hets vo Tschoppehof bis Pommere
E Lehrerschaft wo z'fride isch?
Und wo nit über Stress tuet jommere
Will sy Bildigsurlaub uf de Fidschi isch?

Und z'letscht am Aend, wie s'Amen chunnt
In der Chille, dasch so feig,
D'Frog nach eme See, und öb e Hund
Dä villicht scho gsoffe heig?

Oh Lieschtel äne däne disse,
Di Rating Platz isch bös im Eimer,
au wenn die do e See vermisse
än ächti Chlütterer Lösig heimer.

En Orisbachstau lot eus hoffe
Vom Gspält bis Lause, und D'Störerklärig
Samt Fiskus sind denn drin versoffe
So gheit doch sicher d'Schwizer Währig!

Vergiss das Rating, heb der Mage,
wenn dra glaubsch so bisch am Arsch
Gniess jetz mit eus die Fasnachtstage
Drum Major rüef jetz: Vorwärts Marsch!